

## **Basef Ifimba Pol Nali' Nanda'ef Fagafe'ma Timotii**

### **Basef bandafi Pol nali' nanda'ef fagafe'ma Timotii**

1:1-2 Pol na'i God noloma Jisas Krais motopalopa Timoti

1:3-20 Pol na'ipa Timoti ma nugalutu banagona  
ma amom magambaso'ami, maga'ipas dindinipa sigaila waf fowa'ifii

2:1-15 Waf bu'wafi esis Kristen sonda' lotuwafi

3:1-16 Waf amom agufumi ma siosi moloma  
magatopalopa agufumi mogailafi

4:1-6:21 Pol na'ipa Timoti ma waf hiafi bu'wafi  
anen nonda'afa nogatopalopa esis Kristen  
hiasi hi'igalas

**1** Ae' Pol anda' pas isi'i. God nowambilai  
apa' mutanimai mope andeande' ea' mape mo-  
hafa anaf owagama mugati Krais Jisas. Amom  
biham mandandepe ma'ipi dindinipa agape aposel  
Krais Jisasi.\*

**2** Ae' anda'menago basef ifimba ina' Timoti,  
ina' nahapifa God dei' nataga nogame ae'inai  
endilisi. Ae' a'i God noloma Krais Jisas dembinai  
afa'inai muti uwahipina motopalopena dowaf  
mowa' banagaena, opaf ine'ifi fope sa'ombel.\*

*Apa' mohagofa basef baso'afi hiafi*

\* **1:1:** Ap 16:1-3; Ta 1:4; Kl 1:27    \* **1:2:** Fl 2:24

**3** Fowa' ae' afo'o itap lu'upa Masedonia ma aga'ipina dei' na'amba atin, a'ipina wapani. Ina' ata' nendape atapina na'amba Efesusa niga'ipa anom amam dindinipa ina a' mi'ipasa anif basef baso'afi, owa'i. Mi'ipasa basef Godi atif.\* **4** Amom mokwaha basef ambas amamba talimi dowad-owafa basef mamimami hiami saga'i agof isimba bafa'w ifa'w asasisi. Basef amamba magalala-mona nomonas asasimi, magafela ukup asasimi sa'i basef sandahihianamaefami, amamba ina mogowa' banaga maol Godi, owa'. Maol inimba natagama mogahapifa God atona.

**5** Apa' mu'uli inimba dei' aga'ipipani, i'i esis sohapilan silan, malogof fagape opalef asasilifi nomoni, fa'ipas fihimba'masa waf asasifi ina awef, owa'. Esis sahapifa God endilisi. Ama atiasi waf afamba hiafi fesa'ma ukup pigapigaila God nogaloma anis daias wapani. **6** Apa' anom amam ukup passo'ama waf afambai bu'wafi. Ea' dei' mololama basef bu'wafi ma'i basef wafifi atif.\* **7** Amom ma'i mopoma mogawalipas mu'uli Godi si'i anom dembami tisa ma'i, "Basef afa'ifi endilisifi atif." Apa' amom ina mogawa basef ifimba maga'iefi mogawa kofagefa wapania, owa'!\*

**8** I'i apa' mogawa mu'uli Godi milan, na'ambai andeande'. **9** Apa' mondogawa isimba wapani, mu'uli inimba ina nafi'mai epes isimba sagape andeande'i, owa'atin. Inimba nafi'mai epes sanda' waf awafii, sogosambala mu'uli inimbai owa' sogape lafela amom agufumia. Ea' anis sogowa' alafugaha Godi sanda' waf awafii. Anis

---

\* **1:3:** 1 Ti 4:7; Ta 1:14    \* **1:6:** 1 Ti 6:4,20; Ta 1:10    \* **1:7:** Ro 7:12,16

saga'i waf Godi hapaifii, ma sagaila waf itapafi atefi. A anis saha ahapas mamasas sagaga'i, saha anis daidaias wapani sagaga'i.\* **10** Anis sanda' so'a wauli ma waf afamba awafii, a anis sagahambomba ga anis amam nematawa si'i fowa' Sodom sanda'afi. Ea' anis sakwalopa anis epes sambaho'was sape anis daias safi'i satalisa sonda'mas maol. Ea' anis sambaso'ami, ea' anis sambaso'am saga'i basef endilisi gani ilifi. Ea' anis sanda' waf afambai, faloma anef waf hiafi awafi fapa' fagaloma basef endilisifi. Mu'uli Godi nafi'i naga'i epes isimba sanda' waf awafi.\* **11** Basef ifimba fape basef bu'wafi God a nase'ef ae' ma egawalapef. Basef ifimba bu'wafi fa'ipapa God bu'winai endilisi kofagonama dagalai, naloma hiahaom mogogala'i.\*

### *Pol nanifela Goda nagatopalopana dowaf*

**12** Dembinai ape'inai Krais Jisas nase'e banagami, okom mapoma ae' bu'uwai anda' maol ananini, nanda'e alutuma maol inimba, ea' anifelona. **13** Endilisi, fowa' dondol a'i basef anda' salamala agol ananigili, apa' aloma esis Kristen, anda' du'wanigama anen. Apa' ae' ina egawa andeande', owa' ihapifanaia, ea' dei' anda' waf afamba awafima anen atapiwi ape. Isimba atis dei' natolowe uwahipiwi natopalope. **14** Dembinai ape'inai natopalope dowaf nowa' banagae dei' ahapifana okom maimailana aloma hiasi.\* **15** Anif basef endilisifi atifa epes hiasi

---

\* **1:9:** Ta 1:9   \* **1:10:** 1 Ti 6:15   \* **1:11:** Ap 9:15; Ga 1:15-16;  
1 Ko 15:9-10; Ga 1:13   \* **1:14:** Lu 15:2, 19:10

some'efa sogahapifif. Basef ifimba na'amba. Krais Jisas nisila'i itap apa'e ma nofa'apa epes manda' waf awafi mokwahomapaf mutanimai mogape andeande!. Ae' ea' ma'uwi ali' anda' waf awafi ikila' anis daiasi ea' ma'uwi ae' atowe. **16** Isimba atis dei' God na'i uwahipigama ae' ali' ma Krais Jisas na'i nihimba'masa anen ina okom wandafunama ae' ulal, owa!. Ae' anda' waf awafi ikila' anis daias, apa' owa' anen nape nohafe nogota lautai ma itanima igafi'mai anen. Ama owagama hiasi sogati ae' ma esis wapani so-hapifana sogofa' ambal namili sogape andeande' liflafi.\* **17** Anen dembinai King nagape dondol liflafii. Anen owa' nogaga'ia, epes owa' la'ifisa sogatolonaia. Anen atona God endilisinai. Ae' a'i agol lu'wagili banagami mogogala'i mondapoma anen atona dondol liflafi. Endilisi.\*

*Timoti nenda' wandaf banagena nendaloma amom boumi*

**18** Nogame ae'inai Timoti, dei' ase'enago basef ifimba nenda' maolanafi. Ae' okom mandanda'ma basef Godi fowa' amom profet Ambal bu'unai Godi nasa'mam maga'ipinafi. Ina' nila basef ifimba, nenda' wandaf banagambel ande-ande' neloma esis bousi.\* **19** Wandaf afamba ina' banagena nigahapifa God nenda' waf usi'ifi hilili', ma malogol gagape opaf ina' nomoni ina gihimba'mena anef waf awafi ina' nanda'afi, owa!. Anis epes sowa' alafugaha waf afambai bu'wafi. Ea' dei' hapif asasini papalalan ea' awasin si'i sip palalap pagail otamba awasip

---

\* **1:16:** Ro 16:27 \* **1:17:** 1 Ti 6:12; Ju 3 \* **1:18:** 1 Ti 3:9

pagala naoh.\* <sup>20</sup> Epes hiasi sanda' waf afambai, amam biam Himeneusi Aleksander hapif amamini a' awen. Ae' andaiwa'mam ali'amonam mafe' lagof Seteni ma mogogawa gawa fasini. Anda'am na'amba amom ina a' monda' basef findiwaefa agol Godi, owa'i.

## 2

### *Waf afamba betenafi*

<sup>1-2</sup> Maol inimba ae' a'i esa'ma okom ine'imi nenda'ani, basef fagali'i na'amba. Ipa' pendabeten pefala God pihali'ana, pinifelona ma epes hiasi pendabetenanen nogatopalopa esis soloma amom king dembami moloma gavman dembami wapani. Ipa' pendabeten na'amba ma apa' hiapai tol mogape opalef awanelef, mogaila waf Godi usi'if hilili'i.\* <sup>3</sup> Beten inimbai bu'wani ma naep Godi, notanima nogofa' apa' mogape andeande'i. I'i apa' monda' waf afambai mondabeten, anen sonahana ma apa'!\* <sup>4</sup> Anen na'i nofa'i epes hiasi sotanimamai anen sope andeande'ma sogogawa basef endilisifi kofagefa. <sup>5</sup> Apa' mogawa God atotona nepe. Ea' anona aman nagape la'afena God naloma epesi, anamba aman endilisinai anen Krais Jisas.\* <sup>6</sup> Anen fowa' God nandandepana ea', nakwaha ambal ananili atola natala apa' epes hiapai nakwahomapa waf awafi mogotanimai. Nemaf afamba dondo'afi Krais nihimba'mapa God na'i nowambilai epes

---

\* **1:19:** 2 Ti 3:17; 2 Ti 4:14-15; 1 Ko 5:5      \* **2:1-2:** Ef 6:18; Fl 4:6

\* **2:3:** Esi 18:23; 1 Ti 4:10; 2 Pi 3:9; Ro 3:29-30; Hi 12:24      \* **2:5:**

Ga 1:4

hiasi sogotanimai.\* <sup>7</sup> Ea' dei' God nanda'e ape aposela egawalapa basef bu'wafi ananifi. Ae' a'i endilisi, ina ambaso'am. Anen nanda'e ape dembiwai tisa ma epes anep mini'ap sogololama Godi ma sogahapila basef ifimba endilisifi.

<sup>8</sup> Ea' dei' ae' a'i epes hiasi walemb hielimbi sondabeten. Ae' okom ma'i esis hiasi sondape bo'wes hilili', sokwaha ukup wandafipi peloma migimigah sondabeten.\*

### *Basef awo nematawai*

<sup>9</sup> Ae' a'i awo nematawa wapani ondanda' klos mais bu'wasi atis, sondahama awo dondo'. Ina onda'as bandabandas a'owa' sotambel bim-bitagw, owa'i. Awo ina ondagala sosaf anambai, ofalo'ma balagah alop si'ipa bahigis mamimami hiami moloma sosaf gol fasimi si'i kapai, owa'. Klos isimba sagalotamas a'owa' otamba hiambai owa'i otalisa, hapaisi.\* <sup>10</sup> Apa' nematawa wa'i basef wa'i ogape awasi Godi, awo ondanda' maol bu'wani hiani naninani. Maol inimba si'i sosaf awoufi endilisifi. <sup>11</sup> Nemaf mamahefa ipa' penda' lotu main, nematawa awo ondawali-pama ogaila waf afamba sa'umbilifi ea' osopama malogofa ogofa' basef andeande'\*. <sup>12</sup> Ae' ina a'i aho'ma ano'w nemata'w kope dembe'wi tisa kope kwili' kowalepa amoma basef, owa'. Nematawa osopama malogof ondame' basef atif.\* <sup>13</sup> Basef kofagefa fagape na'amba. Fowa' God nali' nanda' aman Adam, ama main nanda' Iv

---

\* **2:6:** Ap 9:15; Ga 2:7-8; 2 Ti 1:11   \* **2:8:** 1 Pi 3:3-5   \* **2:9:** 1 Ti 5:10   \* **2:11:** 1 Ko 14:34   \* **2:12:** Jen 2:7,22; 1 Ko 11:8-9

kwagi!.\* <sup>14</sup> Adam ina nahapifa basef baso'afi, owa!. Nemata'w kwahapifa basef baso'afi, ea' k wataga nemata'w kwanda' waf awafi. <sup>15</sup> Waf nemata'w kwanda' afamba. Awo ondahapifa God endilisi ea' ukup pipila anis daias otopalopas, ea' ondape bo'owa hilili'ma ugumafi awo ande-ande'ma waf awafi akawa.

I'i uhapila waf afamba wilaf atapiwa, God atiasi nokwahomawa waf awafi nofa'awa utan-imai ogape andeande!. Ma ogola awasima, atiasi notopalopawa ogolas andeande!.

## 3

### *Basef amom mugumafi siosi*

<sup>1</sup> Basef ifimba endilisifi. I'i aman ami ni'i nogape dembinai nugumafi esis Kristen sios Godi, anen okom monda'i maol fasini a'owa!.\* <sup>2</sup> Ea' aman ami nope nugumafi siosi nondape ande-ande' a'owa' ma epes ina siti anef waf awafima anen, owa!. Anen noso' nemata'w atoto'w. Ina nea' embel okom moso'ana, owa!. Anen nomonas sondapaona nundumafi alop ananipi andeande!. Anen nindaila okom bu'wami atom nondal' waf hiafi usi'ifi. Anen okom mil'i hiasi alipisi atis ananisi hi'ilas nondaso'as gwa'aisi. Anen nope notaga tisa bu'winai ma basef bu'wafi atif. <sup>3</sup> Ina nea' embel banagimbeli hiambel, owa!. Ina okom wandafuna kwafalis, owa!. Nonda' epes sa'ombemas. Ina nohas atin, owa!. Ina okom mil'i moni a'owa!. <sup>4</sup> Anen numafi awasi waulu'mana andeande', ea' nondal' awasi

---

\* **2:13:** 2 Ko 11:3   \* **3:1:** Ta 1:6-9; Ap 20:28

ananisi sila basef ananifi, ma sonda' agol ananigli gogape andeande!. <sup>5</sup> Aman mamahonama owa' nugumafi awasi soloma waulu'mana andeande'ia, anen ina notaga nope agilinai numafi sios Godi, owa!. <sup>6</sup> Aman anamba nagataga Kristen dambanai ina nope dembinai numafi sios, owa!. Na'amba nonda' du'wanigama God nili'amonana si'i nagali'amona Satan.\* <sup>7</sup> Aman agol bu'wagilinai ma amam nematawa sogololama Godi, dao' aman anamba notaga nope numafi sios. Apa' anen i'i owa' agol bu'wagilinaia, atiasi anen ambal aola waf awafi ea' nofe' nuwis isag anamba Seteni ea' nofa'ana.

*Basef ifimba ma amom magatopalopa agufumi siosi*

<sup>8</sup> Ea' na'amba atina amam amamba magatopalopa agufumi siosi, amom ukup pendape usi'ipa maol amamini. Amom ina mi'i malogof biagof, owa!. Ina mea' embel banagimbeli hiambel a'owa' mohagamogaol, owa!. Ea' ina mombaso'mas molomas mofa' otamba anis epesi, owa!. <sup>9</sup> Basef ifimba endilisifi fowa' fandambahi'i dei' fataga fandawalap alilihof, amom mondahapilif sisihif atapif. Ea' malogof fagape opalef amamilifi nomoni fendape hilili' andeande!. <sup>10</sup> Pigali' ata' pegwamba maol amamini. Ama piti monda'an andeande'ma, dao' a' mope monda' maola sios.\*

<sup>11</sup> Ea' na'amba atina wauhiamam amamuwai ukup pendapaowa andeande'ma maol awo onda'ani. Awo ina ondaha basefa anis,

---

\* **3:6:** 2 Ko 8:21    \* **3:10:** Ta 2:3

owa'i. Ondape andeande' ina wea' embel numbutimbeli wain hiambel, owa'i. Dondol ondanda' waf bu'wafi atef. <sup>12</sup> Amam monda' maol siosi, wauhiamam amamuwai ato'w atin. Amom mundumafi awo oloma awasi amamisi andeande'. <sup>13</sup> Amom mogape monda' maola siosi, i'i monda' maol fasini, atiasi mofa' agof fasigufi. Ama banagem mogowalapa basef bu'wafi, mihimba'mas amom magahapifa Krais Jisasi.

### *Basef kofagefa ma waf Godi*

<sup>14</sup> Endilisi ae' a'i efe'mago ina' kwafalis, apa' dei' ata' anda' basef ifimba ina'.<sup>\*</sup> <sup>15</sup> Ma i'i owa' efo'o etaga ulala, ina' nitigu basef ifimba ea' negawago waf afamba esis sagape andeande'afi ma wambota atamba Godi. Wambota atamba esis sios Godi ambal namili lagapaunai. Sios Godi si'i olaf banagafi fogowa' banaga basef endilisifi.\* <sup>16</sup> Endilisi atis, basef ifimba kofagefa lu'wafi a'owa'. Owa' anin epen la'ifina negegawefa, owa'. Fandambaho' fape fafe' fafe' dei' God nihimba'mafaef alihif. Basef ifimba na'amba.

Anen nataga epen endilisi nofa' alop epesi, nataga nandawalap. Ambal bu'unai Godi nihimba'mapana anen aman bu'unai nagape hilili'i. Amom ensel Godi matolona. Basef ananifi fafe'ma esis wambotagw amam nematawa hiasi sogololama Godi. Esis epes itapasi sahapifana. Ea' God nofa'ana nalota heven nepe mogolala'i ananimi.

---

\* **3:14:** Ef 2:19-22    \* **3:15:** Jo 1:14; Mk 16:19

## 4

*Basef ifimba ma epes sagambaso'ami*

<sup>1</sup> Ambal bu'unai Godi na'i basef alihif na'amba. Anaf owagama anis epes sokwaha sagahapifa basef endilisifi Godi. Ea' aseme' malogofa epes isimba ambagof awami magambaso'ami sila basef ambagof awami maga'iami.\* <sup>2</sup> Anom amam magambaso'ami mawalipasa basef ifimba baso'afi. Malogof fagape opalef amamilifi nomoni faso' si'li saofa otamba sagasambagof. Amom ina atiasi ata' momeme'ma waf awafi mogawaf, a' owa'atin.\* <sup>3</sup> Atiasi muwalipasa basef ifimba ma esis sigihi'a waf sandaso'amafi sigihi'a anis gwa'aisi epes saga'asi wapani. Apa' gwa'aisi isimba God atona nanda'asa apa' epes mahapifana mogogawa basef endilisifi. Amambai, apa' mofa'am minifela Goda moga'am.\* <sup>4</sup> Hiahaom hiami God nanda'ami, bu'wami atom. I'i minifelonamam, andeande' mofa'am. Ina mok wahom, owa'. <sup>5</sup> Dei' main, basef Godi faloma beten sanda' gwa'aisi isimba sataga bo'wes hilili'.

*Timoti, nepe aman bu'unai nenda'mana maol Kraisi*

<sup>6</sup> Ina' i'i negaso'asa basef ifimba esis Kristen alipisima, dao' atiasi nepe epen bu'winai nenda' maola Krais Jisasi. Ea' nefal' banagami lu'wami ma basef fagasa'ma hapif ine'inii ma gawa nefal'an nagailani.\* <sup>7</sup> Apa' esis amam nematawa saga'i numunefisa basef atom wafimi,

---

\* **4:1:** 2 Ti 3:1; 2 Pi 3:3; 1 Jo 2:18; Ju 18      \* **4:2:** Jen 9:3; Ro 14:6;  
 1 Ko 10:30-31      \* **4:3:** Jen 1:31; Ap 10:15      \* **4:6:** 1 Ti 1:4, 6:20;  
 2 Ti 2:16

newa' alafugamam. Ina' nendelafa waf Godi andeande' nendegawam.\* <sup>8</sup> Ina' negawa, waf afamba niwalipa alop si'ipa ponda' maol pigiawi, isimba la'ifis kwasala ma sogatopalopapa. Apa' ina' nendelafa waf Godi dao', banagef endilisi ma fegatopalopapa ma waf hiafi. I'i ina' nelafa waf Godi, afamba fatopalopa apa' epes hiapai ma dei' magape itap nogota ata'e, ea' fetopalopapa anaf heven wapani.\* <sup>9</sup> Basef ifl'i endilisifi atifa epes hiasi si'i awi ma seme'ef sogahapififi, ifimba na'amba.\*

<sup>10</sup> God anen ambal namili lagapaunai. Anen na'i nowambilai amam nematawa hiasi hi'ilas sotanimai sogape andeande'. Ea' dei' endilisi atis nowambilai epes mamahisa sagahapifanai. Dei' mape mohafana ma'i endilisi nogofa'apa. Isimba atis dei' manda' maol numa'uni endilisi.

<sup>11</sup> Ina' nese'asago basef ifimba fefe'mago esis amam nematawa, ea' niwalipas dindinipa sigailif.\* <sup>12</sup> Esis sati ina' ukup pandanda' pa'i, ina' ata' sa'winai, apa' ina si'i ina' aman falafunai, owa'atin. Ina' nendape si'i ametal bu'wani ma esis Kristen sigaila waf bu'wafi ine'ifi ma fe', poe, ki, hapif ine'isi, soloma waf afamba okom magaila anis deindeiasafi, soloma waf bu'wafi hilili'i. <sup>13</sup> Nogota atamba ina' ata' nepe atapina nehaftago ae!. Ina' nenda'ago maol banagambela nigatalifa basef Godi alihigima ma epes hiasi, ea' nesa'mago ukup asasipi ma waf sonda'afi ea'

niwalipas ni'ipaso andeande!\* <sup>14</sup> Fowa' agufumi mugumafi siosi mawamona lagofena. Ambal bu'unai Godi nasa'ma manda'mena beten ea'anom amam ma'i basefa presen inimba anen naga'si'inani. Dei' nenda' maol banagen nindimafi presen andeande' inimba God nali' nagase'enan dowafi.\* <sup>15</sup> Dondol ina' nindimafi maol inimba banagena atapina nendapoman. Ama epes hiasi sigati waf ine'ifi fegataga fasif. <sup>16</sup> Solawaina andeande'ma waf ina' nanda'afi, ma basef ifimba nigawalipasafi. Dondol ninda'am na'amba atapina banagambel. Ina' i'i nenda'as na'amba, atiasi God notopalopena neloma esis sogagahembe'ma basef malogol ine'igili, nowambelepa pitanimai pegape andeande'.

## 5

### *Waf bu'wafi fagasindi'amona amam nematawai*

<sup>1</sup> Ina nenda' megahogaha amam hagami niga'ipam diga lu'ugai, owa'i. Nisindi'amona ni'ipam basef sa'umbilifi, nenda'as si'i nanda'manas ahamena ine'inai. Ea' nisindi'amona amam amamba sa'umi si'i nagasindi'amona owapena ine'imi.\*

<sup>2</sup> Nisindi'amona nematawa hagiwai si'i nagasindi'amona ma'mena ine'ikwi. Ea' nisindi'amona nematawa sa'uawai si'i nagasindi'amona haniti'mina ine'ikwi, ma waf usi'ifi.

### *Basef ifimba ma nematawa alifiwai*

---

\* **4:13:** 2 Ti 1:6; Ap 6:6, 8:17   \* **4:14:** 1 Ti 5:22   \* **5:1:** Lev 19:32

**3** Basefa nematawa alifiwai faga'i na'amba. Nematawa awamba, i'i owa' anin open numafifawaea, ina' nendanda'asawa andeande' nimafiawa. **4** Apa' i'i ano'w nemata'w alifi'wi anis awasi akwa'usi a'a bafasa'w akwa'usi sope esis ata' sondogawa andeande' na'amba. Maol asasini nigali'i sumafi ahadas mamasas asasisi atis ata' sili' ma sogagwa wiaf fowa' sugumafias. Esis sonda'as na'amba saila basef Godi. Aho', God okom ma'iaf a'owa' waf afambai.\* **5** Apa' i'i ano'w nemata'w alifi'wi ato'w gwaigwai'w kogape, ako'w konda'as na'amba. Ako'w kogawa endilisi God atiasi nogatopalopa'wi ma waf fasifi, kofala God lifilafi owamb alipa beten akwa'uni. **6** Apa' i'i ano'w nemata'w alifi'wi kwila okom akwa'umi atoma kwandagala alop atop dowaf, ako'w si'i kwagaga'i. **7** Ina' nesa'ma nomonas nematawai ma ugaila basef ifimba, ma awo atiasi ogape hilili'. Ama anin open ina ni'ipawa ni'i awo wanda' waf awafi, owa!. **8** Epen ami owa' nigimafi esis esimbel atembel ananisia, anin ina atiasi nimafi esis wambota atota endilisi mamasan ahasan soloma batawisan. Epen inimba nakwaha hapif a' nataga open awani endilisi nikila' isimba owa' sogahapifa Godia.\*

**9-10** I'i anowa nematawa wahupawa magaga'awai awo ina onda' so'a waol, owa!. Ope andeande'ma anis dais sotolowa siga'i wagape andeande'i. Onda' maol bu'wani ma ugumafi batawisa, ogaso'as gwa'aisi epes ogatopalopa esis Kristen wambota Godi, umafi awasi awausi

---

\* **5:4:** Lu 2:37, 18:7    \* **5:8:** Hi 13:2

andeande' ope onda' maol hiani bu'wani nani-nani ofe' ofe' ottagama afagof 60-pelaiguf, dao'. Nematawa awamba nenda' agofawa negawawa ma negaso'awa gwa'aisi. Nematawa wanda'as na'ambai atowa ina' nenda' agof awaugufi fil okwatiha negatopalopawa.

**11** Apa' ina' owa'i nenda' agofa nematawa awamba awo ata' sa'uwal aiawawai alifiwai, owa!. Hapewai. Ama nemaf mamahefa awo wi'i ugi'ma nomonas awousi ondagala alop awoupi atop wi'i ogaso' anom amam wapanima dao', ea' diamawago. Awo nomonas isimbai sapaowa, dei' ea' wakwaha wafa basef bu'wafi Kraisi fowa' wagahapilafi. **12** Dei' wakwaha basef bu'wafi banagafi fowa' wa'if wagaloma Kraisi. Wanda' waf afambai awafi, na'amba kofagefa awoufi.\* **13** Ea' anef waf awo wanda'afi wapani. Wanda' waf afamba ala'uta tahasa sanda'afi, ea' wafe' wawis ifagw hi'alagw. Awo ina ala'uta tahawa atin dowaf, owa!. Wakwalopa basef anis da-iasi wanda'ef pi'ipe'ef wafe'agon hi'alagon. Ea' wawalapa basef faffifi ina andeande'ma apa' muga'if, owa!.\* **14** Isimba atis dei' a'i nematawa awamba ata' aiawai kwasakwasalai atiasi oso' amam wapani ma ola awasi umafias ogape ifagw awaugwi atogw. A'i awo ina onda' anom mae-fah awami motagama esis bousi ma siga'i anif basef awafi ma apa', owa'atin. **15** Ina' negawa anowa nematawa wahupawa magaga'i, wakwaha ufia'w fasi'wi wafe' waila Satan.

**16** I'i anota wambota nemata'w akwambai ako'w Kristena anowa nematawa alifiwai ope, ea'

---

\* **5:12:** 2 Te 3:11 \* **5:13:** 1 Ko 7:9

Kristen akwamba kumafiawa. Ako'w konda'as na'amba esis sios ina nomal'w nohasa sugumafawa, owa'atin. Na'ambai andeande'ma sios sugumafi nematawa kwahuwai awo atowa waga-pani.\*

<sup>17</sup> Agufumi mamahoma mugumafi ipa! Kristen monda' maol andeande'i, ipa' pinifelom penda'am andeande' pimafiam pese'am gwa'aisi mais bif atif mikila' anom deiom. Agufumi manda' maol Godi magawalipasa basef kofagefa ananifi ipa' pindimafiam na'amba atin andeande!.\* <sup>18</sup> Basef fagape Buk Baibeli faga'ias na'amba fa'i, "Ina' owa'i nesopama malogofa bulmakau manda' maol magafa'asa witi, owa'."

Ea' anif basef wapani na'amba fa'i, "Aman nanda' maoli anen nogofa' anis hiahawes du'wanisa maol ananini."\*

<sup>19</sup> I'i anin epen atitin ni'i, "Agilinai anamba nugumafi esis Kristeni nonda' waf awafi, ina' owai' neme'anama basef ananifia, hapaini. I'i epes bias a'a wanis isi'i basef ifimba ma waf awafi anen nanda'afi, dao' ina' neme'as.\* <sup>20</sup> Apa' i'i anom agufumi monda' waf awafi, ina' nisindi'amonana dindinipa naep esis Kristen hiasi. Ma anis daias ombal mogahaha waf afambai, ma ina sonda' ambambai, owa'!

<sup>21</sup> Ae' anda'epa ina' andeande'ma nogohnaep Godi naloma Krais Jisas maloma amom ensel God nandandepami. Ina' nindaila basef ifimba andeande!. Ina' owa'i ninifala anom sa'umi

---

\* **5:16:** 1 Ko 16:18    \* **5:17:** 1 Ko 9:9; Mt 10:10    \* **5:18:** 2 Ko 13:1    \* **5:19:** Ga 2:14; Ef 5:11

ni'ipam mehipa. Ea' owa'i nenda' anom dembami sa'ombemam ni'ipam sa'umbela, owa'i. Niga'ipas na'amba atin. Ea' owa'i ninifala anis epesa, a nenda' anis alipisi sa'ombemasa. Niga'ipas na'amba atin. <sup>22</sup> Ina' owa'i nifa'i anona aman kwafalis nenda'ana nope agilinai ma esis Kristena, owa!. Nili' negawana, nendondoma anen nanda' waf bu'wafi a'a nanda' waf awafi. Na'amba anis epes sitilina netopalopa anona nanda' waf awafi, si'i ina' wapani nanda' waf awafi. Ina' solawaina ma negape hilili'.

<sup>23</sup> Ina' nekwaha waf afamba nega' embel atembel wafimbel dowaf. Andeande'ma nogal' wain kwaia'wina negatopalopa opaf ine'ifi ma negatofa aowas inimba dondol nanda'inai. <sup>24</sup> Waf awafi anis epesi fape alihifa esis fafe' fali'as sogawaf kwafalis atis. Apa' waf awafi anisi fape fandambaho', ama main afataga fandawalap. <sup>25</sup> Ea' na'amba atin, anef waf fasifi wapani fape fandawalap. Apa' anef waf fasifi ina fandawalap ulal, ata' owa!. Afamba wapani ina fandambaho'w dondoli, owa!.

## 6

### *Basefa epes agof akasi sanda' maol dowafi*

<sup>1</sup> Ipa' Kristen agof akipai panda' maol dowaf pagape lafela anis daiasi, ipa' ata' ukup pendanda' na'amba. Dembami mugumafi ipe'i, ipa' pinifelam pi'i bu'wami pesa'ma agof amamugufi peme' basef amamifi. Ama anis epes daias ina atiasi si'i basef awafi ma agol Godi, ma waf

ipa' Kristen, owa!\* <sup>2</sup> Ipa' agof akipai panda' maol dowadowafi ma amom agufumi dembami anom Kristen, ipa' ina ukup pendanda' na'amba pi'i, "Anom Kristen sahopafa atom ea' hapaimi, osambala malogof amamugufi." Owa'atin.

Ipa' ukup pendanda' na'amba pi'i, "Amom Kristen ea' afa' ukup pipilam, onda' maol amamini andeande', ukila' maol wanda'ana amom agufumi owa' Kristenia." Dei' main, ipa' agof akipai patopalopa amom Kristen ipa' ukup pagapagailami. Timoti, basef ifimba ina niwali-pasef nesa'ma ukup asasipi newa' banagas.

### *Waf endilisifi ma sogofa' hiahaom hiami*

Dondol ina' niwalipa esis amam nematawa ma sonda' waf fasifi, ea' nesa'masa sonda'am.\* <sup>3-4</sup> Basef dembinai Jisas Kraisi fawalipapa ande-ande'ma waf Godi. I'i anona aman nokwaha basef ifimba ma nowalipa esisa anif basef daif owa' fefe' dondo'ma basef ifimba fasisi usi'ifi Jisasia, apa' mogawa aman anamba na'i nondal' du'wanigai. Anen ina nogawa kwasakwasala, owa'atin. Anen nomonas awasisinai. Anen okom manda'i waf afamba nondopambema nogalo-masafi atefa, nifitap nondalomasa basef kofagefa. Basef ifimba atif fagawalapa waf afambai. Opalef awalefa anis daindaias, sonda' findiwa, ma so-gape ukup aweawep pegapoma sahin owan.\* <sup>5</sup> Epes isimba sandanda' na'ambai, ukup asasipi paolas endilisi, ea' ina sahapila basef fasifi endilisifi, owa'. Ea' sa'i basef sapa'ef sandahihianama

---

\* **6:1:** Fm 16; Ef 6:5   \* **6:2:** 2 Ti 1:13; Ga 1:6-9   \* **6:3-4:** 2 Ti 3:8, 4:4; Ta 1:14

saloma anis. Ea' sa'i, "Ufia'w akwamba Godi ufia'w sogofa' uga'wi."\*

<sup>6</sup> Endilisi atis, epen ami nigaila waf Godi, ma anin okom mondanda'ma hiahaom ananimi ni'i. Ea' ma'um a' dondo'ma anin ea', opaf ananifi fope awanef nepe andeande!.\* <sup>7</sup> Apa' mogawa, mamamapa olapa magataga itap apa'e, nemaf afamba apa' ina mofa' anom hiahaom mafi'i, owa!. Anaf mogaga' wapani ina atiasi mofa' anom maefah mofe' molomapa itap apa'e, owa'atin endilisi.\* <sup>8</sup> Apa' anis gwa'aisi luwaguf mais soga'omepa, apa' mi'ias mi'i, "Ea' ma'wis isimba ea' andodo'ma apa!."\*

<sup>9</sup> Apa' epes ukup pape sa'i sogofa' uga maina hi-anai, esis atiasi sowa ma gwamba anamba aunai, si'i huguf sandowam sambaho'wam magapoma mafisi ma mofe' mowala mopoma sogaham. Ea' atiasi ukup maminami awami motagamasa hiahaom awami monda' esisa ukup moso'as hig-iligalas lamonas endilisi.\* <sup>10</sup> Waf afamba ukup pigal'i moni a'owa!, kofagefa ma waf hiafi awafi. Anis epes ukup lu'um ma'ima'i moni a'owa!, ea' waf afambai fahondo'as sakwaha sagahapifa Jisas asafe'ma waf awafi. Ea' sofa' akafimi hiami lu'wami awami a'owa!.\*

*Ina' nihapila ambal namili tatala'il nendape liflafi*

<sup>11</sup> Apa' ina' aman Godi, newa' alafugama hiahwes isimba nefe' nila waf afamba bu'wafi.

---

\* **6:5:** 1 Ti 4:8; Fl 4:11-12; Hi 13:5 \* **6:6:** Jop 1:21; Ekl 5:15

\* **6:7:** Pro 30:8 \* **6:8:** Pro 23:4, 28:22 \* **6:9:** Ef 5:5 \* **6:10:**

2 Ti 2:22

Ea' nenda' maola negefa' waf usi'ifi endilisifi Godi, nihapifa Jisasa okom mogamogaila anis daias. Ama nugalutu banagena ma waf awafi anis sonda'menafi. Ina' nenda' waf sa'umbilifi ma anis epes daias.\* <sup>12</sup> Nigahapifa Krais si'i anin epen nasagih mehip nagaloma anis. I'i anin nesagih mehip nefe' nikila', atiasi nefea' hiahawes. Ina' wapani na'amba atin. I'i nihapifana banagena, anaf nepe andeande' lifilafi. Ina' nihapila okom amamba ambal fasili lagape dondoli fowa' Godnofalena ma negofa'ali. Anen nofalena nemaf afamba ma negawalapa hapif inimba ine'ini naep epes hiasi sanda' lotuma Godi.\* <sup>13-14</sup> God naso'am ambal hiahaom hiami ea' Jisas Krais nawalapa basef kofagefa andeande'ma nogohnaep Pontius Pailat gavman dembinai. Naep Godi naloma Jisas Krais dei' ase'ena maol inimba na'amba. Ina' nimafi nomonas ine'isi andeande' nindaila basef ifimba Godi datima. Alogw owa'i gwilifa, ea' epes ina sonda' findiwa ma basef ifimba. Nimafif nendape na'amba atin nefe' netaga afamba Dembinai ape'inai Jisas Krais nogataga alihina.\* <sup>15</sup> Nemaf afamba God naga'iefi nosapa'ana nifi'i. God atona kofagonama dagalai, anen atona Dembinai King nugumafi epes hiasii, soloma hiahaom hiami hi'igalami. Anen king Dembinai ma king hiamii, a' Dembinai ma dembami hiamii.\* <sup>16</sup> Ea' anen atona owa' nogaga'ia, nagape mogogala'i lu'wami endilisii. Ea' apa' dei' ina la'ifipama mo-

---

\* **6:11:** 1 Ko 9:25-26; 2 Ti 1:18; 2 Ti 4:7  
19:11      \* **6:13-14:** Diu 10:17; Re 17:14

\* **6:12:** Jo 18:36-37; Jo  
\* **6:15:** Eks 33:20

gafe' felefele'ma anen, owa'. Dei' anin epen owa' netelonaia. Owagama wapani, owa' anin la'ifina nogati anona, owa'atin. Ae' a'i agol ananigili lu'wagili goloma banagami ananimi mondapoma anen atona lifilafi dondol. Endilisi.\*

### *Basef ifimba ma hiahaom hiamisi*

**17** Ina' ni'ipa epes isimba hiahaom hiamisi ma itap ana'e ina sonda' du'waniga sohapifa hiahaom amamba mamimami hiami awasim kwafalisi, owa'atin. Ina' ni'ipa epes isimba ma sogahapifa God endilisi, dao' andeande!. Anen atona nagaso'apai hiahaom hiami fasimi manda' ukup ape'ipi pagataga sonogahapi. **18** Ina' kipa epes isimba hiahaom hiamisi, sonda'ama sogatopalopa maol fasini. Esis dondol sowala hiahawes asasisi sofe'ma anis epes.\* **19** I'i sonda'as na'amba, andeande'ma atiasi sogakolaso hiahaom fasimi atom mogatopalopas anafowagama. Sonda'as na'amba, sogofa' ambal fasili endilisi.\*

### *Ina' nimafi maol ine'ini andeande'*

**20** O nogame Timoti, ina' solawaina nindimafi basef ifimba God nagase'enafi andeande' datima. Newa' alafugama basef ifimba baso'afi wafifi saga'i basef gawaifi. Basef ifimbai fa'i fegahambombaga waf Godi.\* **21** Anis epes sahapifa basef ifimba baso'afi sa'i, "Apa' mogogawai." Apa' owa' dei' sakwaha sagahapifa God andola sape.

---

\* **6:16:** Sam 62:10; Lu 12:20    \* **6:18:** Mt 6:20    \* **6:19:** 1 Ti 4:7; 2 Ti 1:14    \* **6:20:** 1 Ti 1:6; 2 Ti 2:18

Ae' a'i God notopalopepa dowaf nowa'! bana-gaipa. Ea' ma'uf.

**Basef Bu'wafi Godi  
The New Testament in the Mufian Language  
Nupela Testamen long tokples Mufian long Niugini**  
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

---

PDF generated using Haiola and XeLaTeX on 11 Nov 2022 from source files  
dated 9 Oct 2020

9d2b07f2-4ac7-545a-943c-e16df691ef3f